

Nunatta inuiattut timersornikkut unammersuarterfissaanik qulisamik ”National stadion”-imik pilersitsinissaq siunertaralugu Naalakkersuisut pilersaarummik kingusinnerpaamik UKA2016-mi saqqummiunneqartussamik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Pilersitsinissamat pilersaarummi misissorneqassapput unammersuarterfissap ingerlanneqarnerani sanaartornissamilu aningaasatigut pissutsit atuuttussat.
(Inatsisartunut ilaasortaq Anders Olsen, Siumut)

Akissuteqaat

(Ilinniartitaanermut, Kultureqarnermut, Iisimatusarnermut Ilageeqarnermullu Naalakkersuisunut ilaasortaq)

Aappassaaneerpeqarnera

Aallarniutigalugu Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliap isumaliutissiissutaa innersuussutigissavara, "National Stadion"-millu qulisamik sanasoqarnissaanut pilersaarummik suliaqarnissamat Naalakkersuisut peqquneqarnissaanik Inatsisartut aalajangiiffigisassaattut siunnersuummik sukumiisumik sulisimanermut qujanarlunga. Siullermeerinnineq aallaavigalugu ataatsimiititaliap isumaliutissiissummini isummersuutiminik nassuiaavoq, tamannalu aamma nangillugu Naalakkersuisunut kaammattuisimalluni qulisap inissinneqarfigisinnaasaanik misissuisoqassasoq, taakkununga ilanngullugit aningaasatigut kingunerisassai, atuinissamat periarfissat qanorlu periarfissaqartigineranut misissuinissat.

Naalakkersuisut siunnersuuteqartumut ataatsimiititaliamullu ugguuna isumaqataapput matumani "National Stadion" pineqarmat, arsaannermuinnaanngitsoq aammali siunertanut allanut atorneqarsinnaassamat, soorlu ilaatigut timersuutinut allanut. Taamaammat Naalakkersuisut anguniagaraat, illorsuup illoqarfimmiuniit avataaneersuniillu sorpassuarnut atorneqarsinnaassussatut pilersaarutigineqarnissaa.

Siullermeerinnittoqarnerani naatsorsuutigisattut maluginiarpara "National Stadion"-ip sumiinnissaa eqqartorneqaleraangat tamatta immikkoorluta sumiiffitsialammik isumaqaratta. Nunarput tamakkerlugu timersornerup siuarsaaffigineqarnissaa tamatta suleqataaffigerusukkipput tusaallugu qiimmaallannaqaaq. Taamaammat ataatsimiititaliap kaammattuina Naalakkersuisut tusaatissatut tiguaat, pilersaarutillu suliarinerani inissiiffiusinnaasut ilanngunneqarnissaat isumagiumaarlugu.

Naalakkersuisut isumaqarput ”National Stadion” tassaasariaqartoq atuisunit ajornanngitsumik orninneqarsinnaasoq, illoqarfillu inissiiviususaaq inissaqartitsilluarsinnaasariaqartoq, taamaalineranimi tikeraat avataaneersut amerlasuut inissaqartinneqartariaqarmata, taakkuusinnaappullu timersortartut, isiginnaariat allallu.

2015-imut Aningaasanut Inatsimmi pilersaarutip suliarinissaanut 1 mio. kr.-nit immikkoortinneqarsimapput. Aningaasat taakku siunnersuuteqartup missiliutigisaanit saqqummiunneqartuniillu amerlanerupput, tassami Naalakkersuisunit pilersaarusiornermut atatillugu ikiortissanik avataaneersunik pissarsisoqarnissaa pisariaqartinneqartut nalilerneqarmat. Tamatuma saniatigut Naalakkersuisut tusarniaanermut atatillugu nammineq kajumissusertik tunngavigalugu suliniutillit peqataatinniarpaat, ilisimasaminnik tunniussisinnanissaannik periarfissillugit.

Peqqissaarussamik pilersaarusiortoqarnissaanut ataatsimiititaliaq inassuteqarsimammat Naalakkersuisunit isumaqatigineqarpoq. Taamatut oqaaseqarlunga Naalakkersuisut sinnerlugit inassutigissavara ataatsimiititaliamit isumaqataaffigineqarluni inassutigineqartoq Inatsisartut akuersissutigissagaat.